

ՆՈՐԱ_ԱՅՏ ՆՏՈՒԹԵՐ 1793—1795 ԹԹ. ՇՈՒՇԻԲԵՐԴԻ ՀԵՐՈՍԱԿԱՆ
ՊԱՇՏՊԱՆՈՒԹՅԱՆ ՄԱՍԻՆ

Հայկական ՍՍՀ Մինիստրների սովետին առնթեր հին ձեռագրերի ինստիտուտ Մաշտոցի անվան Մատենադարանում է պահվում «Պատմութիւն գաւառին Արցախու» ձեռագիր աշխատությունը «գրեալ ի Յակոբ սարկաւազէ Պօղոսեան Զաքարեանց Շուշեցոյ միաբան սուրբ Երուսաղէմի յամի 1853 ի սուրբ Երուսաղէմ»¹: Այս հեղինակի մասին ավելին իմանալու նպատակով մեր պրպտումների ընթացքում Մկրտիչ Աղավնունու «Միաբանք և այցելութիւն հայ Երուսաղէմի» աշխատության մեջ հանդիպեցինք հետևյալ երկտողին. «Յակոբ սարկաւազ Պօղոսեանց Զաքարեանց Շուշեցի, միաբան 1860-ին սուրբ Յակոբի վանքին կրնդօրինակէ, անտառ այլաբանութեան գիրքը»²:

Հեղինակի մասին տեղեկություն կա նաև նրա «Պատմութիւն գաւառին Արցախու» աշխատության 14-րդ էջում գտնվող հիշատակագրության մեջ, ուր ասված է. «Այս անձը ազնիվ և միանգամայն իբր հրեշտակ է և վարժապետ կացուցած պատրիարքէն քաղաքի (իմա Երուսաղէմ—Ռ. Տ.) հայ ժողովրդոց դպրատան, ուր քսանիւ շափ աշակերտք կան հասարակ կարդացողք և տասիւ շափ օրիորդք որոց ձեռքը համանգամայն գիրք շկայ և վարժապետք ամսական համարյա թե շունին և տղոց ծնողքը խելճ ու վրանին գլուխին շկայ բացի գրեանց, մինչև անգամ հարկաւորը դուռ շունին և այլն»³:

Նույն ձեռագրում արված մի այլ ծանոթագրությունից հայտնի է դառնում, որ Հակոբ Շուշեցին 1862 թվականին Երուսաղէմում ձեռնադրվել է վարդապետ՝ Ղևոնդ անունով: Այլ տեղեկություններ նրա մասին չունենք:

Հակոբ Շուշեցին հավաստում է, որ ինքն ականջալուր հեղինակ է և իր պատմության մեջ նկարագրված իրադարձությունների մասին լսել է իր նախնիներից: Նա խոստովանում է, որ իր լսած բազմաթիվ անցքերից շարադրում է այն միայն, ինչ հիշում է, ինչպես և ներողություն է խնդրում՝ անունների հնարավոր անճշտությունների համար⁴:

«Պատմութեան» կրկնօրինակի առաջին իսկ էջում նա նշում է, որ ինքն ինչ-որ շափով ականատես է եղել իր նկարագրած քաղաքական անցքերին: Այսպես, նա գրում է. «Սույն գունակ և իմի հնախօս բերանոց հարց և ծերունեաց լուեալ ե յոյժ սակաւուցն ի յետին ժամանակի ականատես լեալ յսնդրգնեցայ ի գլուխ պատմութեանս և կալեալ սկսեալ ի շինութենէ անտի բերդաբաղաբիս Շուշույ, որ ինչ անցք անցին ընդ ազգին մեր ի գաւառին Ղարաբա-

1 Մաշտոցի անվ. Մատենադարան, ձեռ. 2734, էջ 1:

2 Մկրտիչ Աղավնունու «Միաբանք և այցելութիւն հայ Երուսաղէմի», 1929, Երուսաղէմ, էջ 326:

3 Մատենադարան, ձեռ. 2734, էջ 14:

4 Նույն տեղում, էջ 23:

ղու՝ որ և Արցախու յաղետալեացն և ի բարեաց անյապաղաբար վիպել ձեռն արկի ըստ իմում նիազ ունակութեանս և տկարագոյն մտացս»⁵:

Հակոբ Շուշեցու «Պատմութիւն գաւառին Արցախու» ձեռագիր աշխատութիւնը առ այսօր հայտնի է եղել միայն Ա. Ի. Տեր-Գրիգորյանին: Վերջինս 1940-ական թվականներին թարգմանել է այն ռուսերեն և տրամադրել Ադրբեջանի գիտութիւնների ակադեմիայի պատմութեան ինստիտուտին, որտեղ և պահվում է 924 թվահամարի տակ, ձեռագիր վիճակում:

Ն. Լևիատովը իր «Ուրվագծեր Ադրբեջանի 18-րդ դարի պատմութեան» աշխատութիւնը շարադրելիս օգտվել է Հակոբ Շուշեցու աշխատութեան ռուսերեն թարգմանութիւնից և այն բնութագրել իբրև սկզբնաղբյուր: Հեղինակի մասին Լևիատովը գրում է. «Այս՝ դեպքերի ականատեսի հասարակ և պարզունակ պատմութիւն է: Տեղ-տեղ պատմութիւնը նույնիսկ պրիմիտիվ է, կան և շափազանցութիւններ, սակայն հեղինակը կարողանում է դիտել և նշում է իրադարձութիւնների կարևոր և վեռական կողմերը»⁶:

Արդ, քանի որ հայ բանասիրութեան մեջ Հակոբ Շուշեցու աշխատութիւնն աննկատ է մնացել, ուստի հարկ ենք համարում ծանրանալ նրա վրա:

Հակոբ Շուշեցին իր «Պատմութիւն գաւառին Արցախու» աշխատութեան մեջ նկարագրում է 18-րդ դարի կեսերից մինչև 19-րդ դարի սկզբները Ղարաբաղում տեղի ունեցած քաղաքական կարևոր իրադարձութիւնները: Նա իր «Պատմութիւն»-ը սկսում է Ադրբեջանի խանութիւնների և Ղարաբաղի մեծիքների դեմ՝ Փանահ խանի վարած պայքարով: Նկարագրում է և Շուշիբերդի հիմնադրութիւնն ու Ղարաբաղի ժողովրդի ստրկական աշխատանքն այդ կառույցի վրա:

Առանձնապէս մեծ արժեք են ներկայացնում պատմութեան այն հատվածները, որտեղ նկարագրված են Մուհամմատ Հասան խանի ('Ղաջար), Ուրմիայի Ֆաթալի խանի, Քերիմ խան Զենդի Ղարաբաղ կատարած արշավանքներն ու սրանց դեմ Ղարաբաղի հայ և ադրբեջանցի ժողովուրդների հերոսական պայքարը, որ մղում էին նրանք իրենց հայրենի երկրի ազատութեան համար:

Այսուհանդերձ Հակոբ Շուշեցու «Պատմութիւն» աշխատութեան առանցքն են հանդիսանում Աղա-Մուհամմատ խանի 1795—1797 թթ. արշավանքները և սրանց նախորդող, 1793—1795 թթ. հետախուզական զորամասերի հարձակումները Շուշիբերդի վրա:

Հակոբ Շուշեցին ականատեսի լավատեղյակութեամբ է ներկայացնում Ղարաբաղի ժողովուրդների՝ հայերի ու ադրբեջանցիների օտար նվաճողի դեմ մղած պաշտպանողական, տեղ-տեղ հարձակողական ու պարտիզանական կռիւլները: Պատկերավոր ու նույնիսկ վիպական ձևով է ներկայացվում Շուշիում սլաշարված կանանց անօրինակ պայքարը սլարսից հրոսակախմբերի դեմ:

Հանձին ներկայացվող ձեռագիր աշխատութեան, մենք ունենք ևս մի ուշագրավ սկզբնաղբյուր՝ հատկապէս Ղարաբաղի պատմութեան կարևոր դրվագներից մեկի՝ Աղա-Մուհամմատ խանի արշավանքի և ռուսների դեպի Անդրկովկաս շարժվելու ժամանակաշրջանի մասին, որն այս առումով մեղ հայտնի հայկական սկզբնաղբյուրներից ամենածավալունն է:

⁵ Նույն տեղում:

⁶ В. Н. Левинатов, Очерки из истории Азербайджана в XVIII веке, Баку, 1948, стр. 169.

Հայտնի է, որ Նադիր Շահի մահից հետո, կարճ ժամանակամիջոցում Աղբրեջանում ձևավորվում են մի շարք խանություններ: Հաջի Չելերին կրկին դառնում է Շեքիի խան: Ժամանակակիցների վկայությամբ, նա այնքան է հզորանում, որ կարողանում է ոչ միայն գրավել Ղարաբաղի խանության մի մասը, այլև իր իշխանության ազդեցությունը տարածում է մինչև Թավրիզ քաղաքը: Այդ նույն ժամանակաշրջանում Ջհարի մարզից հանդես է գալիս Փանահ խանը իր կողմնակիցներով, կովի բռնվում Չելերիի զորամասերի հետ: Չնայած վերջինիս հաջողվում է ցրել Փանահ խանի ջոկատները, սակայն երբ Պարսկաստանից վերադառնում են Փանահ խանի ցեղակիցները, նրան հաջողվում է Ղարաբաղից հեռացնել հակառակորդի զորամասերը, իսկ Բայաթ կոչվող բերդի մոտ տեղի ունեցած ճակատամարտում ջախջախվում է Հաջի Չելերիի բանակը:

Այնուհետև Փանահ խանը իր իշխանությունը հաստատում է Ղարաբաղի վրա և մտահոգվում նրա ապահովությամբ: Ես միաժամանակ օգտվելով Պարսկաստանում տեղի ունեցող ներքին խռովություններից, իր ազդեցությունը տարածում է մինչև Արղաբիլ ու այնքան է հզորանում, որ նույնիսկ ազդում է Գանձակի խանության ներքին գործերի վրա: Փանահ խանի աջակցությամբ Դանձակի խանության աթոռը գրավում է նրա համախոհներից Ջիադ-օղլին: Սակայն, այդ օրերին փոխվում է դրությունը հարավային Աղբրեջանում, Ամիր Ասլան խանի փոխարեն հանդես է գալիս Մուհամմատ Հասան խան Ղաջարը (Աղա-Մուհամմատ խանի հայրը—Ռ. Տ.), որը հզորանալով մեծ վտանգ է դառնում նաև հյուսիսային Աղբրեջանի համար:

Ելնելով այս լուրջ վտանգի առկայությունից, Փանահ խանը իր առաջնահերթ խնդիրն է դարձնում Ղարաբաղի խանության հարավային սահմանների ամրապնդումը: Այս առիթով հրավիրված խորհրդակցության մասին հիշատակություններ են թողել Աղբրեջանի պատմագիրներից Ջամալ Ջվանշիր Ղաբաբադին⁷, Միրզա-Ադի-Գյոզալ բեկը⁸ և ուրիշներ:

Խորհրդակցության մասնակիցները, վերահաս վտանգից փրկվելու համար անհրաժեշտ են գտնում ստեղծել մի հաստատուն հենարան: Այդ վտանգը նրանք սպասում են ոչ միայն ներքին, այլև արտաքին թշնամու կողմից: Ահա այս հարցին յուրովի անդրադարձել է նաև Հակոբ Շուշեցին. «...և յետ ժամանակաց,—գրում է նա,—ինչ կոչեաց խանն զմեծամեծս և զիշխանս երկուց ազգաց (հայ և աղբրեջանցի—Ռ. Տ.) ասէ ցնոսա կամիմ զի բերդ մի տալ շինել բա(յ)ց շփտեմ տեղի մի ամուր և յարմար. յառաջեաց Շահնազարն և ասէ ցուցից մեծութեանդ լեառն մի որ ստորադիր է գեղջէն Շուշույ, բաց (ի) ի տեղոյն ոչ գտանէք յայլ ուրէք հարմարագոյն քան զայն՝ և ըստ կամաց ձերոց յարմար շինութեան բերդաքաղաքի»: «...Եւ յորժամ տեսին և հավանեցան հրաման եհան խան(ն) ընդ ամենայն գաւառն՝ յիրաքանչիւր տանէ այր մի ժողովել, զի եկեսցեն հացին իրեանց ի շինութիւն բերդին: Ըստ հրամանի խանին իրաքանչիւր գիւղականք ընդ ինքեանս ունելով զիշխանս իրեանց: Ժողովեցին ևս զամենայն հիմնադիր ճարտարապետս ի լեառն այն:

7 Джамаль-Джваншир Карабаги, Карабаги («Кавказ», 1855).

8 Мирза Адигезаль-Бек, Карабах-наме, 1950, Баку.

Հիմնարկին շինութիւն 50 աշտարակի ի մէջ հինգ հազար կանգնաշափ երկարութեան պարսպին»⁹։

Իսկ թե որքան հաջող է ընտրված Շուշի բերդաքաղաքի կառուցման վայրը, Հակոբ Շուշեցին գրում է. «Հիմնարկութիւնս այս միայն ի կես բերդին էր, իսկ մնացեալ կեսն, որպէս յիշեցաք, յԱստծոյ էր ամրացեալ»։

Ի դեպ, մեր պատմական գրականության մեջ նույնպես նշվել է Շուշիբերդի դիրքի անառիկությունը՝ ժամանակի դազմական տեխնիկայի տեսակետից¹⁰։ Այնուհետև հեղինակը հանգամանորեն նկարագրում է Շուշի բերդաքաղաքի կառուցման ընթացքը։ «Ամառային էր ժամանակն յորժամ սկսան զնել պարիսպ ի վերայ հիման։ Ի կատար լերինն մարդիկք որք ի ծարաւ տօթոյ արեգական, և որք ի սաստիկ ցրտաշունչ հողմոյ գիշերային ժամոյն բացօթեայք ցրտահար լեալ անկան մեռեալք, ի մէջ տասն աւուրց անձինս յիսուն և երկերիւրոյ շափ անկան ի ջերմ և ի տենդ. իսկ որք առողջ համարեալքն էին նոքա ևս փախստեայ դարձան ի տունս իւրեանց։ Յայնչափ խղճութիւնս տեսեալ խանին ոչ խղճացաւ նոցա։ Այլ կրկին հրամայեաց զօրականացն իւրոց զի երթեալ ի գեօղս ուր դտանիցեն ածցեն զերիտասարդս զծերս և պատանիս բռնի թէ և ի տանն միայն իցէ որ զնա ևս ածցեն անխնայ։ Եւ զինուորքն գնացեալ զօրս գտին բռնութեամբ գանիւ ածին ի լեառն. և մնացեալքն թագեան փախստեայ ի ծերպս և ի հովիտս լերանց։ Ի փապարս քարանց և ծառոց, յանտառս և յայգեստանիս. թողեալ զտունս և զընտանիս իւրեանց, զկալս և զվաստակս յարձակավայրի ի կերակուր գազանաց և թռչնոց։

Իսկ որոց բռնի տարան՝ նախքան շինութիւն պարսպին ետուն շինել հովանաւոր հարկ մի վասն ժողովրդեանն, զի մի ի բացի ննջեսցեն գիշերային և ի սաստիկ տօթոյին կես աւուր ժամոյն՝ ընդ հովանեաւ նորահանգիցեն քանի մի ժամ յետ այնորիկ կեսք հիվանդաց պակասեցան»¹¹։

Բերդաքաղաքի կառուցումն ավարտելուց հետո Փանահ խանը բնակիչներ է հրավիրում նախ շրջակա գյուղերից և ապա այլ վայրերից։ Ղարաբաղի խանության պատմագիր Միրզա Զեմալ Զիվանշիրը գրում է, որ Փանահ խանը հիմնելով Շուշիբերդը «այստեղ է տեղափոխել Շահբուլաղում բնակվող բոլոր ռահաթներին, նախ ազնվական մարդկանց ընտանիքներին, մելիքներին, ծառայողներին և քեթխուղաներին (գյուղական տանուտերերին) և նրանց տեղ հատկացրել բերդի մեջ բնակվելու համար»¹²։

Հակոբ Շուշեցին պատմում է, որ Շուշվա բերդի կառուցումից հետո Փանահ խանը նոր բնակիչներ հրավիրելով Շուշի՝ արտոնություններ է խոստանում նրանց. «Որք ի բնակութիվն եկեսցեն ընտանեօք ի քաղաքս նորաշեն՝ ազատ են յամենայն հարկաց և ծառայութեանց»։

Եթե լեռն վերապահությամբ է խոսում Շուշի քաղաքի առաջին բնակիչների էթնիկական կազմի մասին, ապա Հակոբ Շուշեցին որոշակիորեն հիշատակում է, որ ժողովրդական հսկայական զանգվածներ են գաղթել՝ Վազանչիից, Ագուլիսից, Մեղրիից։ Նրանցից շատերը, գրում է հեղինակը, ուրախու-

⁹ Մատենադարան, ձեռ. 2734, էջ 3։

¹⁰ Լ Ե Ո, Պատմութիւն Ղարաբաղի հայոց թեմական դպրոցի, 1915, էջ 62։

¹¹ Մատենադարան, ձեռ. 2734, էջ 3։

¹² Ռ. Զ. Տ Ե Բ-Գ ա լ ս տ յ ա ն, Շուշիի բնակչությունը 18-րդ դարից մինչև մեր օրերը, ԳԱ «Տեղեկագիր», 1963, № 9, էջ 68։

թյամբ են թողել իրենց շարժական ու անշարժ գույքը և հեռացել իրենց բնակավայրերից...

Անդրադառնալով այդ ժամանակաշրջանի պատմական իրադարձություններին, լեոն հիշում է թե «Այն ժամանակ, երբ Փանահ խանը անառիկ բերդ էր դարձնում ժայռե հսկայական պարիսպներով շրջապատված Շուշին, Արաբսի հովտի այն մասերում, ուր գտնվում են Նախիջևանը, Գողթանը տեղի ունեցան մի քանի նշանավոր դեպքեր: Ղաղանչի գյուղը կոչվում էր Շահկերտ: Բնակիչները պղնձագործներ էին, այդ արհեստից էլ գյուղն ստացել է իր անունը (Ղաղանչի՝ կաթսա շինող): 1750 թվին մենք տեսնում ենք այդ գյուղը ապրտամբական դրության մեջ. ամրացել է գյուղի մոտ գտնվող սարի վրա, դիմադրում է Նախիջևանի պարսից խանին, Հեյդար անունով, վրդովված նրա արարքներից»¹³:

Ինչ վերաբերում է Ազուլիսից գաղթածներին, Չամչյանը իր «Պատմութիւն հայոց» աշխատության Գ հատորում գրում է, որ 1780 թ. պարսից Ազատ խանի հրոսակախմբերը բարբարոսաբար հարձակվում են իր ժամանակի նշանավոր այս քաղաքի վրա, որը հին Ջուղայից հետո, համարվում էր ամենանշանավոր առևտրական կենտրոնը, ավերում քաղաքը, գերեվարում ժողովրդին և վաճառքի հանում արևելյան շուկաներում:

Այս փաստերից հետո հասկանալի է դառնում, թե ինչու ազուլեցիք և ղաղանչեցիք ուրախությամբ էին թողնում իրենց բնակավայրերը և հեռանում էին Շուշի, ապահովություն գտնելու ակնկալությամբ:

Քանի որ Շուշին կառուցվել էր Վարանդայում, Փանահ խանի բարեկամ ու դաշնակից Մելիք Շահնազարի տիրույթի սահմաններում, ապա հասկանալի է, որ բացի եկվոր տարրերից, Շուշիի բնակիչների զգալի մասը հայեր էին: Իսկ թե 18-րդ դարի 50-ական թվականներին որքան հայեր էին բնակվում Ղարաբաղում, Հակոբ Շուշեցին հաղորդում է հետևյալ տեղեկությունը. «Հայազգի բնակիչք վիճակին Ղարաբաղու եօթանասուն հազար հոգի թուին ընդ ձեռամբ վիճակաւոր առաջնորդին Բաղդասարայ արքեպիսկոպոսին ի ցեղէն մեծ իշխանապետին Աղուանից Հասան Ջալալեանց»¹⁴:

Հետաքրքրական է նաև այն, որ Մեսրոբ Թաղիադյանը նույնպես «Ճանապարհորդութիւն ի Հայս» աշխատության մեջ Շուշիի ազգաբնակչության էթնիկական կազմի մասին գրում է. «Բնակիչք նորա Հայք և Թուրք: Հայքն հաշուէին լինել 500 տունք և ունէին եկեղեցիս երիս, զԱզուլեցւոց՝ զՂարաբաղցւոց՝ և զՂաղանչւոց այլ քարակերտ և զմեծ եկեղեցիս ի նորոյ շինէին յայնժամ երկոքին եղբայրքն Թառումեանք՝ Չոհրաբ և Մարկոս»¹⁵:

* * *

Պատմական իրողություն է, որ Ղարաբաղի Փանահ խանը Շուշի բերդաքաղաքի կառուցումից հետո մտահոգվում է սպառազինել իր ժողովրդին և սկսում է ռազմական պատրաստություններ տեսնել հարավային Ադրբեջանի խաների կողմից սպառնացող վտանգից պաշտպանվելու համար: Հակոբ Շուշեցին նկարագրում է նրա նախապատրաստական աշխատանքները, սակայն

13 Լ Ե ո, նշված աշխատությունը, էջ 63:

14 Մատենադարան, ձեռ. 2734, էջ 3—4:

15 Մ Ե Ս Ր Ո Ր Թ ա ղ ի ա ղ ե ա ն, Ճանապարհորդութիւն ի Հայս, 1848, էջ 226:

չի խոսում հարավային Ադրբեջանի Մուհամմատ Հասան խանի և Ուրմիայի Ֆաթալի խան Աֆշարի նկատմամբ նրա տարած հաղթանակների մասին:

Հակոբ Շուշեցին վրիպում է և այն հարցում, երբ դրում է, թե Փանահ խանը «վճարեաց ղկեանս իւր անաւարտ թողեալ ղկամս իւր, բայց ի տեղոջ հօրն զորդին նստուցին վերոյ յիշեալ բեկքն ղԻբրահիմ խանն գաւառապետ Ղարաբաղու»¹⁶, Մինչդեռ, հայտնի է, որ Փանահ խանը դեռ կենդանի էր և գտնվում էր Քերիմ խանի պալատում, երբ նրա որդին՝ Իբրահիմ Խալիլը նշանակվեց Ղարաբաղի կառավարիչ:

Հայտնի է, որ 18-րդ դարի 90-ական թվականներին Պարսկաստանում հաղթում ու հզորանում է Աղա-Մուհամմատ խան Ղաջարը և դառնում Պարսկաստանի մեծ մասի տիրակալը: Նա մտածում էր բարձրանալ պարսից գահը, ապա իր իշխանությունը տարածել Պարսկաստանի երբեմնի տիրույթների վրա: Սակայն համաձայն Պարսկաստանում գոյություն ունեցող սովորույթի, սովորույթ, որն օրենքի ուժ էր ստացել, պարսից շահերի թագադրման ժամանակ երկրի շրջա վալիներից գոնե մեկի ներկայությունը համարվում էր պարտադիր և տեղի էր ունենում անպայման Արղավիլ քաղաքում՝ հարավային Ադրբեջանում: Այս կապակցությամբ Դուբրովնի գրում է. «Հասկանալի է, թե ինչու Աղա-Մուհամմատ խանը, ձգտելով պարսից գահին, ամենից առաջ պետք է նվաճեր Ադրբեջանը և իր իշխանությունը ենթարկեր վրաց թագավորին: Նա գիտեր, որ եթե Արղավիլում շթագաղղվեր, այլ մի ուրիշ քաղաքում, և եթե այդ արարողություններին ներկա չլիներ Վրաստանի վալին, ապա ժողովուրդը նրան շահ չէր ճանաչի: Այդ պատճառով Աղա-Մուհամմատ խանը Թեհրան վերադառնալուց անմիջապես հետո, օգտվելով նաև Գանձակի Ջավաթ խանի խոստումից՝ իրեն համագործակցելու մասին վրաց Հերակլ-2-րդի դեմ, իր մերձավորներից մեկին՝ Սուլեյման խանին, 20,000 զորքով ուղարկում է Թավրիզ: Նա հրամայում է հավաքել շրջակայքի բոլոր խաներին (Խոյի, Արղավիլի, Նախիջևանի, Երևանի, Գանձակի և այլոց), և հարկադրել նրանց՝ ընդունելու իր գերագույն իշխանությունը: Միաժամանակ պահանջում է համոզել Ղարաբաղի Իբրահիմ խանին հետևելու նրանց օրինակին, հակառակ դեպքում կարգադրում է՝ ավերել նրա ողջ ունեցվածքը և գրավել Շուշին: Իբրահիմ խանին Իրանի տիրակալին ենթարկելու պարագային, Սուլեյման խանը պետք է միանար վերոհիշյալ խաներին՝ վրաց Հերակլ 2-րդի դեմ դուրս գալու համար»¹⁷:

Աղա-Մուհամմատ խանի Սուլեյման Սարգարին տրված հրամանի ժամանակը Բուտկովի մոտ որոշակիորեն նշված է 1793 թ. ամառը¹⁸: Այս փաստը Հակոբ Շուշեցին ոչ միայն հավաստում է, այլև ներկայացնում է շատ ավելի հանգամանորեն:

Սակայն Սուլեյման խանի առաքելությունը Ադրբեջան հաջողությամբ չպսակվեց: Գանձակի խանից բացի տեղի խաները շարձագանքեցին նրա կոչին:

Իբրահիմ խանը, տեսնելով իրեն սպասող լուրջ վտանգը, օգնություն է հայցում վրաց Հերակլ արքայից ու Ռուսաստանից: Թալիշի Մուստաֆա խանը գիմում է Ռուսաստանի օգնությանը, որի տիրույթներից ոչ հեռու կանգնած

¹⁶ Մատենադարան, ձև. 2437, էջ 4:

¹⁷ Н. Дубровин, История войны и владычества русских на Кавказе, т. III, СПб, 1886, стр. 8.

¹⁸ П. Г. Бутков, Материалы для новой истории Кавказа с 1722 по 1803 год, часть II, СПб, 1869, стр. 326—327.

էին ուսական գինվորական զորամասերն ու ռազմական նավերը: Սրանց խնդիրն էր՝ պաշտպանել Գիլանում և Մազանդարանում գտնվող ուս վաճառականների շահերն ու մերձկասպյան գոտիները՝ Աղա-Մուհամմատ խանի զորամասերի հնարավոր հարձակումներից¹⁹:

Այս նույն ժամանակամիջոցում Աղա-Մուհամմատ խանը պատրաստվում էր իրագործելու իր ծրագրերը վրաց երկրի ու Ղարաբաղի նկատմամբ: Եվ որովհետև նա դեռևս չէր կտրել Ղարաբաղի խանին հպատակեցնելու հույսը, կրկին պատվիրատար է ուղարկում Իբրահիմ խանի մոտ և պահանջում նրանից պատանդ ուղարկել իր որդուն: Աղա-Մուհամմատ խանի այս պահանջը կտրականապես մերժվում է Իբրահիմ խանի կողմից: Այնուհետև Իբրահիմ խանը ռազմական դաշինք է կնքում Հերակլ Թագավորի հետ և այդ նպատակով նրան է ուղարկում մի զգալի դումար: Այդ ժամանակ Աղա-Մուհամմատ խանը Ղարաբաղի և Երևանի կողմերն է ուղարկում 4000-անոց մի բանակ: Այս զորամասերն անցնելով Արաքսի հարթավայրը, դուրս են գալիս Փոքր Կովկասի լեռները, սակայն այստեղ հովտում նրանց ջախջախում են Իբրահիմի խանի և վրաց արքայազն Ալեքսանդրի զորքերը: Մոտավորապես նույն ժամանակներում Աղա-Մուհամմատ խանի Գիլանից ուղարկած զորքերը ավերում են Թալիշի տիրույթները, թալանում գյուղերը, արմատախիլ անում մետաքսագործության նպատակով տնկված թթենիները: Աղա-Մուհամմատ խանը միաժամանակ էնգելիից և Մազանդարանից ծովով Թալիշ է ուղարկում զորքերով լի Կուրծումի կոչվող 60 պարսկական նավեր, սակայն ուսական ճեղքաբերական նավերը կտրում են նրանց ճանապարհը և հարկադրում վերադառնալ: «Այսպիսիք էին Աղա-Մուհամմատ խանի առաջին բայլերը, որոնք նա նախաձեռնում էր հավանաբար ճեղքաբերական նպատակով, միաժամանակ հուսալով, թե դրանք պատահաբար կարող է և նշանակալից հաջողության հասցնեն»²⁰:

Պարսից զորավար Սուլեյման Շահզադայի 1793—1795 թթ. Ղարաբաղի Իբրահիմ խանի հետ վարած բանակցությունների ու նրա կատարած հետախուզական արշավների մասին պատմագրությանը հայտնի փաստերին Հակոբ Շուշեցին ավելացնում է շատ նորություններ ու մանրամասնություններ, որոնց շնորհիվ հանդիպում մասնավորապես հայկական սկզբնաղբյուրներում:

Ինչպես ասվեց վերը, Սուլեյման Շահզադան 1793 թվականի ամռանը հրաման է ստանում Աղա-Մուհամմատ խանից՝ ամեն կերպ հարկադրելու Ղարաբաղի Իբրահիմ խանին՝ ընդունելու պարսից հպատակությունը: Հակոբ Շուշեցու տեղեկության համաձայն, Սուլեյման Շահզադան նախքան Ղարաբաղի վրա արշավելը հորդորական նամակ է գրում Իբրահիմ խանին, համոզում ու սպառնում վերջինիս, որ իբր ոչինչ չարժե պարսից շահի համար մեծաքանակ զորք մտցնել Ղարաբաղ, սմբակակոխ անել այդ երկիրը, միաժամանակ առաջարկում է նրան՝ իր միջնորդությամբ հաշտվել շահի հետ, այն է՝ հպատակվել նրան:

Ըստ Հակոբ Շուշեցու, Ղարաբաղի Իբրահիմ խանը Սուլեյման Շահզադայի այս հորդորական պահանջագրին պատասխանում է ամենախստագույն արտահայտություններով, չթաքցնելով իր անվստահությունը նրա գրածների նկատմամբ. հիշեցնում է իր հորեղբորը խաբելու, Արղավիլի բանտում ար-

¹⁹ В. Н. Левинатов, там же, стр. 165.

²⁰ նույն տեղում, էջ 167:

գելակելու, վերջում էլ նրա աչքերը բրելու իրողության մասին: Այն մասին, թե որպիսի միասնականությամբ էին հանդես գալիս Ղարաբաղի խանության ժողովրդական լայն զանգվածները՝ բոլոր դասակարգերն ու դասերը ընդգեմ օտար նվաճողի, հեղինակը գրում է. «Յաղթեսցուք և յարկս մի տացուք շահին պարսից»²¹. Ժողովուրդը պահանջում էր Իբրահիմ խանից. «զօրքն և բնակիչք գաւառին առհասարակ կամակիցք եղեն Իբրահիմ խանին՝ վասն վշտալի շարակիր ծառայութեան զոր կրէին հանապազ կամ ծառայել և կամ կեանս վճարել»²¹:

Ղարաբաղի Իբրահիմ խանի հետ վարած անհաջող բանակցությունները սաստիկ զայրացնում են պարսից շահին: Նրա հրամանով Սուլեյման Շահադադան «սկսաւ ժողովել յատրպատական աշխարհէն հեծելազօրս և հետևակս բազումս՝ զի առեալ ընդ արքունիս եկեսցէ ի վերայ գաւառին Ղարաբաղու ժամանակն էր հնձոյ»²²

Ղարաբաղի ժողովուրդը՝ հայ և ադրբեջանցի, լսելով պարսից զորքերի մուտքն իրենց երկրի սահմանները, թողնում է հունձը դաշտում, ցորենը կալելում, տուն, տեղ, ունեցվածք, վերցնում է միայն անհրաժեշտ որոշ պիտույքներ և եղներ ու ցրվում է երկրի տարբեր վայրերը: Մի մասը նրանցից անցնում է Խաչենի ջրաբերդը, մի մասը՝ Ասկարանի ամրոցը, նրանք որոնք անասուն շունեին, փախչում էին Շուշի, իսկ նրանք, որոնց բնակարանները հեռու էին գտնվում ամրոցներից, թաքնվում են լեռներում ու անտառներում: Շուշի բերդում գտնվող «քաջամարտիկները» (ինչպես անվանում է նրանց հեղինակը), նրանց երեխաներն ու կանայք զինվում են պաշտպանելու համար իրենց երկիրը, տունը, ունեցվածքն ու պատիվը: Նրանք գիշերներն անգամ վայր չէին դնում իրենց զենքերը, ավելին՝ «Սոքա գնացին առ Իբրահիմ խանին և ասեն. մի երկնչիր. մեք միայն պահպանեսցուք բերդաքաղաքս, միայն թէ տուր մեզ որքան կարևոր լիցի վառօդս»²³:

Իբրահիմ խանը ոգևորված հարկավորը տրամադրում է բերդի պաշտպաններին, որոնք ձեռնամուխ են լինում իրենց պաշտպանական դիրքերի ամրապնդման դործին: Նրանք այնպես ճարտարությամբ են ամրանում քարայրներում, որ ինչպես հավաստում է հեղինակը, «միով արամբ ընդդիմանային հարիւրաւորաց և այն ոչ զինու, այլ քարամբք»: Այս ամրությունները նկատի ունի Հակոբ Շուշեցին, երբ գրում է, թե Իբրահիմ խանը մտածում էր իր հարստությունը՝ գանձերը, ոսկեղեն ու արծաթեղեն անոթները մինչև պատերազմի վերջը թաքցնել այդ քարայրում, իբրև ամենաապահով վայրում:

Եվ այսպես, առաջնորդելով հսկայական քանակով զորամասերի (ըստ Բուտկովի տվյալների 6000), պարսից զորավար Սուլեյման Շահադադան արշավում է Ղարաբաղի վրա, կանգ առնում Շուշիբերդից «միով թնդանօթածից նպատակաւ հեռի» և պատվիրատար է ուղարկում հայտնելու Իբրահիմ խանին, որ նա անձնատուր լինի:

Իբրահիմ խանը ոչ միայն կտրականապես մերժում է Սուլեյման Շահադադայի վերոհիշյալ պահանջը, այլև վիրավորական խոսքեր է ասում նրա զորքերի հասցեին. «Չերկնչիմ ի բազմութենէ կանանցդ քոց». Իբրահիմ խանի

21 Նույն տեղում:

22 Նույն տեղում:

23 Նույն տեղում, էջ 6:

հասցրած այս վիրավորանքն ավելի է զայրացնում Սուլեյման Շահադադային և նրա զորքերը երեք օր ու գիշեր անընդմեջ ումբակոծում են Շուշիքերդ ամրոցը: Տեղի ունեցած կատաղի ճակատամարտը հետևյալ կերպ է նկարագրում Հակոբ Շուշեցին. «Սկսաւ ի գիշերոյ յայնմանէ մինչ երեք օր արձակել ումբս ի վեր քաղաքին, ի ձայնից մեծամեծ թնդանօթացն հովիտք աղաղակէին, և կանայք յղիք արտաթափ լեալ զերեխայս կորուսանէին յորովայնի, գնդակքն թնդանօթաց, որք նման հնացեալ լուսնոյ՝ կարմրացեալք ցոլային. յօդս ճախարակելով թոթափէին ի վերա քաղաքին, բայց թուլացեալք ի զօրութենէ հեռի լինելոյն նպատակին: Վասն այն ոչ առնէին ներգործութիւն քակտման պարսպաց. այլ ընդ հարեալ պարսպացն անկանէին յերկիր: Այսպէս երեք աւուր անդադար թնդանօթաձիգ եղեն՝ բայց քաղաքին վնաս ոչինչ եղև»²⁴:

Շուշիքերդի ամրոցի տակ կրած խայտառակ պարտությունից հետո Սուլեյման Շահադան դիմում է խորամանկության: Նա գիշերով իր ամբողջ բանակով գաղտագողի թողնում է, հեռանում քաղաքից և տեղավորվում ոչ հեռու գտնվող Դովթալապ կոչվող ձորում:

Շուշիի բնակիչներին երկար ժամանակ անհայտ է մնում թշնամու զորքերի տակտիկական այս հնարանքը, սակայն Իբրահիմ խանը շի կորցնում զգաստությունը. նա հրամայում է չբացել բերդի դռները:

Շուշիքերդականներից ոմանք դժգոհում են խանի այս հրամանից, պատճառաբանելով, որ 20 օրից ավելի է արդեն գտնվում են բերդում, փակված վիճակում, անասուններին կեր է հարկավոր, իսկ իրենց՝ աղուն: Խանը հարկադրված հրամայում է բանալ բերդի դռները: Բերդից դուրս եկած ժողովրդի վրա անմիջապես հարձակվում են թշնամու թաքնված զորքերը: «Սրբնթաց արձակեցան ի վերայ նոցա երկսայրի սրով և խողողեցին զբազումս ի նոցանէ ի մեծ ձորն Ղայպալու կոչելոյ, ի սպանելոցն բազումք հայ էին, որոց զգլուխս հատեալ տանէին Շահադադային յընծայ»²⁵:

Ղարաբաղի Իբրահիմ խանը տեսնելով պարսից զորքերի պատճառած վնասները, օգնություն է խնդրում Ասկարանի ամրոցի վերակացու Հասան բեկից. «Հասիր, դի ահա գլորիմ և առցեն պարսիկք զքաղաքս մեր՝ և զիս ընդ բեղ շարաշար սատակեսցեն»²⁶:

Ասկարանի կառավարիչ Հասան բեկն Իբրահիմի պատգամավորին պատվիրում է՝ գնացեք ասացեք իմ տիրոջը՝ Իբրահիմ խանին ինչո՞ւ է այդքան երկնչում, երբ մեր այս երկու ամրոցները (Շուշին և Ասկարանը—Ռ. Տ.) լի են քաջերով: Եվ նույն ժամին նա մարդ է ուղարկում լրտեսելու թշնամուն: Երկար ու վիպական ձևով է նկարագրում Հակոբ Շուշեցին Հասան բեկի լրտեսի գործունեությունը թշնամու բանակում: Վերջինիս նպաստավոր տեղեկությունների արդյունքը լինում է այն, որ Հասան բեկը զգուշացնում է Իբրահիմ խանին ու պայմանավորվում նրա հետ թշնամու վրա հանկարծակի հարձակում գործելու մասին:

Համաձայն այս պայմանավորվածության Ասկարանի և Ղարաբաղի ժողովուրդը գիշերով երկուստեք հարձակում են գործում թշնամու քնած զորքերի վրա և ծանր կորուստներ պատճառում նրանց: Եվ քանի որ այս մասին հայկական աղբյուրներում ոչինչ չի հիշատակվում, ուստի անհրաժեշտ ենք

24 Նույն տեղում, էջ 7:

25 Նույն տեղում, էջ 8:

26 Նույն տեղում, էջ 11:

համարում Հակոբ Շուշեցու տեղեկությունը նշված ճակատամարտի մասին բերել ամբողջությամբ:

«Իսկ պարսիկք բնաւ շիմացան զոր եղևն, քանզի կերեալ զկասկարայս ի մսոյ պարարտ եղանցն և հորթուցն և արբեալ ի գովացուցիչ ջրոյ անտի ծանրացեալ էին աչք նոցա և մտեալ ի խորին քուն անզգուշութեամբ, մինչև Հասան Բէկն զօրօքն իւրովք դիմեցին ի վերայ նոցա և շարաշար սատակեցին երազումս ի նոցանէ: Եւ նոքա ընդոստացեալ ի քնոյ աճապարեալ այսր և անդր ի խաւար գիշերի ոմն զկնի սուսեր մինչև եկեալ զօրքն Հասան բեկին և քաջքն շուշեցիք խառնեցան ընդ զօրս նոցա շփոթեցին զնոսա և փութով ելին և փախեան: Այնքան բազմամբոխ էին զօրքն պարսից զի սոքա երեք հազարք մտին ի մէջ նոցա և բազումս կոտորեցին և ելեալ խոյս ետուն ի նոցանէ: Իսկ նոքա խելագարեալ առին զսուսերս և կոտորէին զմիմեանս ի միմի գիշերի թշնամի կարծելով զիրեարս: Եւ այսպէս հարկանէին զմիմեանս մինչև ծագել լուսոյ առաւօտուն և տեսին զմիմեանս, զի շիք թշնամի ի միջէ այլ զիրեարս հարկանէին»²⁷:

Ընտելով տեղեկություններից հայտնի է, որ Սուլեյման Շահզադայի առաջնորդությամբ Ղարաբաղ է մտել 6000 պարսից զորք: Հակոբ Շուշեցին գրում է, որ այս ճակատամարտում պարսիկները կորցրել են 4000 զինվոր. նույն հեղինակի վկայությամբ ճակատամարտ էին մտել 3000 զարաբաղցիներ: «...Սուլեյման Շահզադեն իբրև ետես քէ պարտեցաւ խաբեութենէ քշնամեաց և ի զօրացն իւրոց անկան զորք հազար արբ յոյժ զարհուրեցաւ, և խորհէր ի մտի առնուլ զմնացեալ զօրս և փախչիլ»²⁸:

Այս ճակատամարտում կրած պարտությունը հարկադրեց Սուլեյման Շահզադային մտածելու, թե ինչ է սպասում իրեն, ուստի նա խորհրդակցում է թեհրանից իր բանակը ժամանած Հասան Ղուլի հազարապետի հետ, և հայտնում հետևյալ մտավախությունը. «Զի՞նչ արասցուք, երկնչիմ մի գուցէ ամենայն զօրութեամբ դիմեսցեն առ հասարակ ի վերայ մեր և սրոյ ճարակ տայցեն զմեզ: Վասն զի սոքա ամենեքեան Բիստոնեայք, և քուրք, այր և կին, մեծ և փոքր միաբանեալ են յապստամբել ընդդէմ քաղաւորին մերոյ և մեք լստ շափու զօրաց սոցա շունիմք աստ զօրս, արդ ասա ինձ փութով ի գիշերս գաղտ փախեցալ զօրքս ուստի ի Դաւիթ և ազդ արասցուք շահին՝ քող ինքն հոգասցէ»²⁹:

Այնուհետև Հակոբ Շուշեցին տեղեկացնում է, թե ինչպես Հասան Ղուլի և Սուլեյման Շահզադայի որոշմամբ, պարսից զորքերը երկու օրվա ընթացքում թողնում են Ղարաբաղի սահմաններն ու մտնում Արդավիլ:

Հակոբ Շուշեցին գրում է, որ Սուլեյման Շահզադան 1793 թ. Ղարաբաղ կատարած արշավանքից երկու տարի անց՝ 1795 թ. կրկին հրաման է ստանում Աղա-Մուհամմատ խանից արշավելու Ղարաբաղի խանության վրա, հնազանդեցնելու Իբրահիմ խանին, հակառակ դեպքում «ասպատակեսցէ իսպառ զամենայն գաւառս»:

Սկսած Արաքս գետից մինչև Շուշի տանող ճանապարհը Սուլեյման Շահզադայի պահանջով պարսից զորքերն ավերում, հրկիզում են բնակավայրերը.

²⁷ Նույն տեղում, էջ 12.

²⁸ Նույն տեղում: (Տե՛ս նաև «Արարատ», 1877, էջ 145):

²⁹ Նույն տեղում:

սրախողող անում մարդկանց և բռնագրավում այն ամենը, ինչ հանդիպում էր իրենց: Այսպես, ասպատակելով, նրանք «եկեալ հասին ի Վարանդա փոքր գաւառ կոչեցեալն, որ մասն Ղարաբաղու»:

Ղարաբաղի հայ և աղբբեջանցի ժողովուրդը, նրա հմուտ ու դիվանագետ Իբրահիմ խանը հավաքվել էին Շուշի ամրոցում և պատրաստ հակահարված տալու սպասում էին թշնամուն:

Սուլեյման Շահադադայի զորքերը 1795 թ. մտնելով Ղարաբաղ, մոտենում են Շուշի բերդաբաղաբին, վրաններ գցում, զորքը բաժանում շորս մասի: Մի մասը Հուսեին Ղուլի հազարապետի գլխավորությամբ ուղարկում են բերդի արևելյան կողմը, ուր գտնվում էր Ջարուլի գյուղը. երկրորդ մասը տալիս են մի ոմն հազարապետի, ուղարկում քաղաքի հարավային կողմը, դեպի Քարատակ կոչվող գյուղը, երրորդը, Քահմազ Ղուլի հազարապետի առաջնորդությամբ, ուղարկում են ճեղքեալ կոչվող լեռան դիմաց գտնվող շուշեցիների քարայրը: Պարսիկներին անհայտ էր շուշեցիների այնտեղ գտնվելը, և Քահմազ Ղուլի հազարապետն իր զորամասը շարժում է դեպի նշված լեռը:

Պարսիկներին հաջողվում է պաշարել Շուշին: Հետաքրքիր են Հակոբ Շուշեցու տողերը բերդում պաշարված ժողովրդի հերոսական ոգու և հատկապես կանանց սխրագործությունների մասին, որոնք հարկ ենք համարում ամբողջությամբ մեջ բերել: «Ձայս բան լուեալ Շուշեցուց մախային ի սիրտս իւրեանց և սպասէին՝ թէ որպէս սրոյ ճարակ տայցեն զնոսայ... Եւ յետ երկուց աւուրց զիշերայն ամենայն զօրքն պարսից յամենայն կողմանց եկեալ պաշարեցին զքաղաքն: Եւ ի ծագել առատունն ազդ եղև քաղաքին թէ պաշարեցին պարսիկք զքաղաքս իւրեանց: Ամենեքեան առհասարակ մերժեալ զերկիւղն ի բաց, սրտմտութեամբ և ամենայն զորութեամբ վառեցան որպէս հրով: Արք թողեալ զկանայս և զտունս՝ իւրեանց հանդերձ հրացանիւք և սուսերօք ընթանային զէպ ի յարևելեան կողմն քաղաքին, ուր մարդաշէն և տկար պարիսպն էր: Իսկ կանայք զհանդուրժեալ թողին զստեղեայս և զմանկտիս ի տունս՝ արշաւանօք ընթացան ի գլուխ Աստուածաշէն լեռնապատ պարսպին. և փրծուցանէին ի լեռնէ անտի գֆարինս մեծամեծս և գլէին ի վերայ գօրաց նոցա. այնպէս, զի ի գլելն միոյ քարի գֆսանս կամ գերեսունս ի պարսպից միանգամ անշնչացուցանէր»³⁰:

Շուշիի պաշտպանության հերոսամարտերում իրենց արիաբար զոսկորած հերոսուհիներն անբավարար համարելով իրենց արածը, մտածում են նորանոր ձևերով հարվածել թշնամուն և գտնում են ելքը:

«Եւ ի մօտ տեղի ինչ կայր գերանս կուտակեալս՝ արձակեալ ի վերայ և առիւծաբար ի վեր քան զտկար կանացի զօրութիւնս իւրեանց մղելով զարձուցանէին զծանր և զերկար հեծանսն՝ և հոլովէին զառ ի վար լերինն, և քառասունս կամ զլիսունս միանգամ շարաջաղջախ խորտակէին այնպէս, զի յետ միոյ ժամու ի բազմաթիւ զօրաց անտի սկսաւ կարացին փաղչել ի զաշտն, ուր ամենայն զօրքն էին անտ և Սուլեյման Շահադատան իւրեանց»³¹:

Շրջապատելով Շուշի քաղաքը պարսից զորքերը շին կարողանում դրավել այն. նրանք կրկին հավաքվում են իրենց զորավար Սուլեյման Շահադադայի մոտ՝ Իովթալապ կոչվող լեռան գագաթը: Իբրահիմ խանը մտածում է շկորցնել հարմար առիթը և նախապատրաստվել հակառակորդին ուժգին հարված տալու համար: Նա կարգադրում է իր զորքերին ոչ մի կրակ չարձակել մինչև որ թշնա-

30 Նույն տեղում, էջ 15:

մու զորքերն ամբողջությամբ հավաքվեն նշված վայրու: «Եւ ի վեց ժամու աւուրն իրրև դումարեցաւ ամենայն զօրքն ի գլուխն Դովթալապու արձակեցան ամենայն պարսպաց թնդանօթն երեսուն հետզ:ետե անդադար ժամի այնպէս ցրուեցան անհամար բազմութիւն ընդ հովիտն և ընդ փապարս լերանց, մինչև ոչ գտանիլ երկու զինուորակիցք ի միասին»³²:

Ասկարանի ամրոցի զորապետ Հասան Ղուլի բեկը, լսելով պարսից զորքերի պարտության մասին՝ Շուշիի պարիսպների տակ, իր զորամասերով հետամուտ է լինում նրանց մինչև Արաքս գետը: Ի դեպ նա նպատակ է ունեցել կենդանի բռնելու Սուլեյման Շահզադային, սակայն վերջինս թողնելով իր խուճապահար զորքերին, 20 ձիավորով զորապետներով փախչում է Քավրիզ:

1795 թ. ամռանը Շուշի ամրոցի պարիսպների տակ Սուլեյման Շահզադայի զորքերի պարտությունը խիստ զայրույթ է պատճառում Աղա-Մուհամմատ խանին. նա հրամայում է իր մոտ լքելու դասալիք այն զորավարներին, որոնք արդեն Քավրիզ էին ժամանել՝ հանել նրանց աչքերը, կտրել ոտքերի մատերը ու տանել «ի յանցաւորաց քաղաքն Արդաիլ»:

Սկսվում է մի նոր ու ահավոր զորաժողով. Աղա-Մուհամմատ խանը, իր մոտ հրավիրված նախարարների ներկայությամբ, հայտարարում է. «Կենդանի է անձն իմ ես ինքնին երթայց և մի մնասցէ ի գաւառին շունչ կենդանի և կամ ծառ պտղաբեր»։ Այնուհետև 1795 թ. օգոստոս ամսվա սկզբներին Աղա-Մուհամմատ խանը իր 80-հազարանոց բանակով շարժվում է դեպի հյուսիս, դեպի Անդրկովկաս, դեպի Ղարաբաղ:

Այստեղ կանգ առնելով Շուշիբերդի մոտակայքում, նա պատգամավոր է ուղարկում Իբրահիմ խանի մոտ և հանձնարարում ասել «Ես ոչ մարտեաց ընդ քաղաքացիդ մինչև ի սովու զմիմիանս կերիջիք և յայն ժամ ինքնակամ կամոք աղաչեսջիք անձնատուր լինել ինձ»³³:

Պատմագիրը իրավամբ գալիս է այն եզրակացության, որ Աղա-Մուհամմատ խանի այս ինքնավստահությունը անհիմն չէր, քանի որ նրա կողմից ուղարկված զորքերը 3 տարի անընդմեջ հարձակվում էին Ղարաբաղի խանության վրա, հնձի ժամանակ և «ոչ տային թոյլ ժողովել զվաստակս իւրեանց»: Պատմությունն այնուհետև լուում է պարսից զորքի հետագա առաջխաղացման և մեկամսյա հարձակումների մասին. զարմանալի կերպով լուում է և Թիֆլիսի կործանման աղետալի փաստի մասին: Իրողությունն այն է սակայն, որ 1796 թ. ոուսների դեպի Անդրկովկաս շարժվելու լուրը և Շիրազում Աղա-Մուհամմատ խանի դեմ ծագած ապստամբության լուրը, հարկադրում են նրան թողնել Մուղանի դաշտը, վերադառնալ Պարսկաստան՝ ծագած ապստամբությունը ճնշելու համար: Նշված կարևոր քաղաքական իրադարձությունները դժվար է ասել գիտակցաբար, թե անգիտակցաբար շրջանցելով, Հակոբ Շուշեցին անդրադառնում է արդեն պարսիկների 1797 թ. արշավանքին:

Երբ Աղա-Մուհամմատ շահը առանց մարտերի գրավում է Իբրահիմ խանի կողմից լքված Շուշին, դաժան հաշվեհարդար է տեսնում բերդի բնակչության հետ:

«Եւ ետ ածել զառաջեաւ զամենայն իշխանսն հայոց՝ և շարշարեալ զնոսա բազմատեսակ տանջանօք, զի ստոյգն ասասցեն զորքանութենէ յընչից

32 Նույն տեղում, էջ 16:

33 Նույն տեղում, էջ 17:

իւրեանց, դոմանս գլխիվայր կախէին՝ ոմանց ի պարանոց արկանէին հրացեալ կասկարայս և հրացեալ շամփորք խարէին զմարմինս նոցա և ոմանց կարմրացեալ սկահակս անցուցանէին ի վերա սկաւառակի գլխոյն՝ ևս և այլով բազմատեսակ կոշկոճանօք վշտացուցանէին զամենայն բնակիչս քաղաքին: Զսոյս շարշարանս ետուն կանանց ևս ասելով՝ գիտեմք, զի ունիք պահուստս ծրարեալս, անօթս արծաթեղէնս և կամ զայլ ծանրագին ազանելիս բերիջիք շահքն: Եւ իբրև այսպէս յինէ որ տանջանօք անխնայ պարզեաց զամենեսեան քաղաքն յնշից՝ մինչև ղեկեղեցիս ևս, վասն զի կանայք անճարացեալք թէ զինչ տացեն այլ՝ ինչ ոչ մնաց՝ զի տացեն ի գերծուցանել զարս իւրեանց ի վշտացն՝ մտանէին յեկեղեցիս և փթթուցանէին զարծաթս յաւեստարանաց՝ տարեալ մատուցանէին շանց, զի ազատեսցին զնոսա»³⁴:

1797 թ. Շուշիում տեղի ունեցած Աղա-Մուհամմատ խանի սպանութեան դրդապատճառների մասին պատմական գրականութեան մեջ, հիմնականում, գոյություն ունի այն կարծիքը, որ այն ոչ այլ ինչ էր, եթե ոչ՝ նրա անօրինակ դաժանությունների արգասիքը: Անդրադառնալով այս փաստին, Հակոբ Շուշեցին շեշտում է այն վարկածը, թե խանի սպասավորներից Սաֆար Ալին այլևս անկարող հանդուրժելու խանի դաժանությունները, համարձակվում է նրան ասել. «դարձիր և դադրեալ յանգթութենդ. փրկացուցիր զանմեղ ժողովուրդսդ յընչից՝ միթե ի մորթոց իւրեանց հանել կամիս զդոսա»³⁵: Զայրացած ծառայի հանդգնությունից, անգուժ բռնակալը ոտքի է ելնում, անձամբ կտրում նրա երկու ալանջը, վերքերի վրա աղ ցանում և միաժամանակ սպանում, թե հաջորդ օրը պետք է սպանի նրան: Ծառան մտածելով հետևյալ օրվա կրելիք սարսափների մասին, որոշում է սպանել նրան և ազատել ժողովրդին այդ բռնակալի ճիրաններից: Սաֆար Ալին գիշերով գաղտնի մտնում է Աղա-Մուհամմատ խանի ննջասենյակը, զգուշությամբ նրա բարձի տակից հանում է երկսայրի սուրը և խրում խորը քուն մտած բռնակալի սիրտը: Շահը սարսափահար փորձում է վեր բարձրանալ, խոստումներ անել, սակայն շատ ժամանակ չի անցնում անշնչանում է: Սաֆար Ալին դիակը ծածկում է օթոցով ու նույն զգուշությամբ հեռանում: Լուսադեմին նա մտնում է Երից մանկանց հայոց եկեղեցին, հայտնում, որ սպանել է շահին և առաջարկում է այդ մասին շտապ հայտնել Իբրահիմ խանին:

Այնուհետև Շուշեցին նկարագրում է խանի դորքերի խուճապը. «Եվ ով կարէ պատմել թէ որպէս ի միում ժամու այնչափ անթիւ զօրաց նորա որպէս փախեան թողեալ զղէնս և զամենայն պատերազմական գործիս ևս և զդի շահին իւրեանց: Որովհետև նեղ էր գուն քաղաքին և անհնար էր ի միում ժամու ելանել այնչափ զօրաց՝ և բազումք ի նոցանէ լուեալ թէ Իբրահիմ խանն գայ զօրօքն արտաքս ընկեցին զինքեան ի պարսպէն և այսպէս փախան ամենեքեան յերկիրն իւրեանց»³⁶:

* * *

Հակոբ Շուշեցու «Պատմութիւն գաւառին Արցախու» ձեռագիր աշխատութեան մեջ եղած արժեքավոր տեղեկությունները ինչ-որ չափով լրացնում և

34 Նույն տեղում, էջ 18:

35 Նույն տեղում:

36 Նույն տեղում:

հավաստում են 18-րդ դարի երկրորդ կեսի Ղարաբաղի խանության սոցիալ-տնտեսական վիճակի և ժամանակի քաղաքական իրադարձությունների պատկերը: Հեղինակն անդրադառնում է և ուսական զորքերի շարժմանը դեպի Անդրկովկաս, հայազգի զեներալ Մադաթովի սխրագործություններին, Իբրահիմ խանի ուսական օրինետացիան վերջնականապես ընդունելու հետ կապված իրադարձություններին և այլն: Սակայն, այս հարցերին մենք չենք անդրադառնում, քանի որ Հակոբ Շուշեցու «Պատմության» այդ հատվածը գրեթե նոր բան չի ավելացնում գոյություն ունեցող պատմական պաշտոնական գրականությանը:

Р. Т. ТИТАНЯН

НОВЫЕ МАТЕРИАЛЫ О ГЕРОИЧЕСКОЙ ЗАЩИТЕ
КРЕПОСТИ ШУШИ В 1793—1795 гг.

Р е з ю м е

В статье говорится о рукописи под заглавием «История области Арцаха», хранящейся в Матенадаране им. Маштоца за № 2734. Автором рукописи является Акоп Саркаваг Погосян-Закарянц Шушечи, изложивший свою историю в Иерусалиме в 1853 году.

В «Истории» охвачены события второй половины XVIII века в историческом Арцахе (Карабах). Особый научный интерес представляют свидетельства автора об основании крепости Шуши, о нашествии Ага-Магомед-хана на Карабах и о героической борьбе армянского и азербайджанского народов.

Рассматриваемое сочинение самый пространный из всех уже известных армянских первоисточников по истории Карабаха этого периода. В нем имеются весьма ценные сведения и о продвижении русских в Закавказье.

«История» дополняет сведения уже известных первоисточников рядом новых подробностей. Так, интересны сведения о нашествии персидского принца Сулеймана на крепость Шуши в 1793 году, о совместной героической обороне крепости армянским и азербайджанским населением, о нападении объединенных сил Карабаха и Аскарана на персидскую армию, о доблести женщин осажденной крепости Шуши в 1795 году и т. п.

Эти и ряд других сведений в определенной мере дополняют историографию, относящуюся к социально-экономическому и политическому положению Карабаха в последней четверти XVIII века.